

2 TESALONICENSES

Pablo Tesalónica marārē ōādoredea

1 ¹Yu Pablo, yu merāmarā Silvano, Timoteo merā musā Tesalónica marārē Jesúre buremurārē ōādoredea. Musā Marīpuyarā, marī Opu Jesucristoyarā āārā. Irasirigu musārē i papera pūrē gojāa. ²Marīpu āārīnīgū, marī Opu Jesucristo musārē ōārō iritamu, siuñajārī merā āārīrikumakū iriburo.

Pablo, Jesucristo ñerō irirārē wajamoōgū aariburire gojadea

³Guayarā, musā Jesucristore buremudero nemorō ĩgūrē buremunemo, gāme mañemo iriayuro. Irasirirā gua musārē gūñarā, diayema irirā Marīpure usuyari sīnīkōārō gāamea. Gua irasirimakū ōārokoa. ⁴Gua noó waaró, musāyamarē gajerārē Marīpuyarārē ĩgūsā nerērōgue usuyari merā werea. Musā Jesúre buremurī waja masaka musārē ñerō irikerepuru, neō ĩgūrē buremuduúbea. Musārē ñerō waamakūdere gūñaturakōāa. Irire ĩgūsārē werea. ⁵I merāta marī mašā. Musā Marīpuyarā āārīrī waja gajerā musārē ñerō irikerepuru, gūñaturanīkōāa. Irasirigu Marīpu diayema irigu musārē: “Yaarārē dorerogue aarika! Yaarā, ōārā āārā”, ārīgukumi.

⁶Marīpu diayema irigu āārīsīā, musārē ñerō tarimakū irinerārē ñerō tarimakū irigukumi. ⁷⁻⁸Musārē ñerō tarinerārē, guadere ōārō siuñajārī bokamakū irigukumi. Marī Opu Jesús aarirīnu āārīmakū irasirigukumi. Jesús ūmugasigue merā aarīgū, ĩgūrē wereboerā turarā merā, peame

ūjārī pūrā watopegue dijarigukumi. ĩgūya kerere pēduamerārē, Marīpure gāamemerārē buro wajamoōgū aarigukumi. ⁹ĩgūsā ñerō iridea waja perebiri peamegue beosūrākuma. Irasirirā, marī Opu turagu āārīrōgue neō waabirikuma. ĩgū gosewasiririre neō ĩārō marīrōgue beodijusūrākuma. ¹⁰ĩgū aarirīnurē ĩgūyarā ĩgūrē buremurā āārīpererā ĩgūrē ĩārākuma. ĩgūrē ĩārā: “Diayeta ōatarigu, turatarigu, āārīpererā oparā nemorō Opu āārīmi”, ārī, ĩāguka, buro usuyarākuma. Musāde, gua musārē ĩgūyare buedeare buremusīā, ĩgūsā merā usuyarākoa.

¹¹Gua irire gūñarā, Marīpure musāya āārīburire āsū ārī sērēbosania: “Guapu, mu ĩgūsā yu gāamerī direta irirā āārīburo, ārīgū, ĩgūsārē beyepīdī āārībā. Irasirigu ĩgūsārē mu gāamerōsūta āārīrikumakū irika! ĩgūsā āārīpereri murē buremurī merā ōārō iriduarire iriyuwarikuburo. ĩgūsārē mu turari merā irasirimakū irika!” ārī sērēbosāa. ¹²Musā irire irimakū ĩārā, gajerā, marī Opu Jesúre goepeyari merā ĩārākuma. ĩgū musārē: “Yaarā āārīma, ōārō yāma”, ārī ĩāgukumi. Marīpu, marī Opu Jesucristo musārē iritamu, buro maīmakū, irasū waarokoa.

Pablo, ñegū aariburire gojadea

2 ¹Guayarā, daporare marī Opu Jesucristo aariburire, ĩgū marīrē neeōnū, ĩgū purogue āimurīaburire weregura. ²Gajerā musārē: “Marī Opu i ūmugue dupaturi aarirīnu ejasiāa”, ārīmakū gūñarikubirikōāka! Irire péwisibirikōāka! Gajerā: “Irire Ōāgū deyomarīgū yare irasū ārī wereami”, gajerā: “Sugu guare irasū ārī wereami”,

gajerā: “Pablosā irasū āri gojanerā āārímá”, āribokuma. Irire pērā, gūnarikubirikōāka! ³Ārīgatosūbirikōāka! Marī Opū Jesús aariburinū dupuyuro āsū waarokoa. Wārā masaka Marīpū dorerire tarinūgārākuma. Irasiriripoe sugū ñerō iri, tarinūgāgūgora deyoagukumi. Īgūta perebiri peamegue béosūbu āārīgukumi. ⁴Īgū Marīpure iaturigū, āārīpereri masaka Marīpuyare būremurīrē ñerō āri werenīgukumi. Īgū direta būremumakū gāamegukumi. Irasirigū ĩgūrē būremudoregū: “Yūta āārā, ūmugasiguemū musā Opū”, ārīgū, Marīpūya wiigē ñajāa, doanagukumi.

⁵Yū, musā pūrogue āārīgū, irire musārē werebū. ¿Musā irire gūnaberi? ⁶Musā ĩgū ñegū aariburire kāmutaigure masīa. Īgū aariburire kāmutanegirimakū aarīgukumi. ⁷⁻⁸Īgū wārī ñerī iriburire marī masībirikerepū, ñerī ĩgū iririno āārīsīāa. Īgū aariburire kāmutaḡu gajerogue āāsūgukumi. Īgūrē āiadero pūru, ñegū ḡapū aarīgukumi. Īgū ñerō iriri masīsūrokoa. Pūru marī Opū Jesucristo dupaturi i ūmugue aarīgū, puriri merā, ĩgū turari merā ñegūrē wējīgukumi. Īgū gosewasiriri merā aarīgū, ĩgūrē béodediugukumi. ⁹Ñegū aarīgū, wātēa opū Satanás iritamurī merā ejagukumi. Irasirigū wātī turari merā wārī iri ĩmugukumi. “Ūmugasiguema turari merā iri ĩmugū yāa”, ārīgatogukumi. ¹⁰Wārī ĩgū ñerō iriri merā perebiri peamegue waamurārē ĩgū ārīgatorire būremumakū irīgukumi. Īgūsā Marīpūya diayema āārīrīrē būremubirisīā, iri ārīgatorire būremurākuma. Irasirirā tausūbirikuma. ¹¹Īgūsā diayema āārīrīrē būremuduabirī waja, Marīpū ĩgūsārē irire masībirimakū irīgukumi, ārīgatori ḡapūre būremuburo, ārīgū. ¹²Irasirirā āārīpererā ĩgūsā Marīpūya diayema āārīrīrē būremuduamerā āārīsīā, ñerō iririre būro iriduānemorākuma. Irasirigū Marīpū ĩgūsārē wajamoādediugukumi.

Pablo, Marīpū ĩgū beyenerārē tauburire gojadea

¹³Guayarā, musā marī Opū Jesús maīrā, Marīpū beyenerā āārā. Irasirirā

ḡua musārē gūñarā, Marīpure usuyari sīnīkōārō gāamea. Neōgoragueta musārē beyedi āārīmī peamegue waabonerārē taugū. Ōāḡū deyomarīgū turari merā musārē ĩḡūyarā āārīmakū iribu, musā diayema āārīrīrē būremuburo, ārīgū, beyedi āārīmī. Irasirirā tausūmurā āārā. ¹⁴Marīpū ĩgū tauri kerere ḡua musārē buedea merā musārē siudi āārīmī, marī Opū Jesucristo ōārī oparire ĩgū merā opaburo, ārīgū.

¹⁵Irasirirā piriro marīrō gūñaturaka! ḡua musā pūrogue āārīrā buedeare, irasū āārīmakū ḡua musārē gojadeare gūña, irire iritayaka! ¹⁶⁻¹⁷Marī Opū Jesucristo basita, irasū āārīmakū Marīpū āārīnīgū musārē āārīpereri musā werenīrī, musā iririkurire gūñaturari merā ōārō āārīrikumakū iriburo. Marīpū marīrē bopoñarī merā maīgū, perebiri gūñaturari opamakū irigu, ĩgū ōārī siburire: “Oparākoa”, āri masīmakū irigu āārīmi.

Pablo: “Guaya āārīburire Marīpure sērēbosaka!” āri gojadea

3 ¹Guayarā, musārē āsū āri gojatūnua. Guaya āārīburire Marīpure sērēbosaka! Musā, ḡua marī Opūya kerere buedeare pé būremubū. Irasirirā, wārā masaka musā iriderosūta ḡua buerire pé būremuburire, ĩḡūsā ḡuare ōārō bokatīrīñeāburire Marīpure sērēbosaka! ²Surāyeri masaka Jesúya kerere būremubema. Irasirirā masaka diayema irimerā ñerā ḡuare ñerō iribirikōāburo, ārīrā, Marīpure serebosaka! ³Marī Opū: “Āsū iriḡura”, āriderosūta musārē gūñaturamakū irīgukumi. Ñegūrē, musārē ĩgū ñerō iriduare kāmutaḡukumi. ⁴ḡua musārē iridorederosūta irirā irikoa. “Irire marī Opū iritamurī merā ōārō irinīkōārākuma”, āri būremua. ⁵Marī Opū Jesucristo, Marīpū musārē maīrīrē masīnemomakū iriburo. Īgū ñerō tarigū gūñaturaderosūta musādere gūñaturamakū iriburo.

Pablo moādoxeda

⁶Guayarā, Jesucristo marī Opū wāī merā ĩgū dorero merā musārē

werea. Gajerā Jesúre buremurā moāduamerārē, gua musārē buedeare irituyamerārē wapikūnemobirikōāka!
⁷Musā masīa. Musādere gua iriderosūta iriro gāamea. Gua musā merā āārīrā, gajino iriro marīō āārībiribu. ⁸Neō sugure wajamarīō sērē, baabiribu. Musārē gariboduamerā, ūmarī, űamirī gua baaburire moā wajatabu. ⁹Gua musārē bueri waja: “Guare baari ejoka!” āārībonerā āārīkererā, neō irasū āārībiribu. Musārē: “Āsū iriro gāamea”, ārī ĩmuduarā gua basi moā wajata baabu. ¹⁰Gua musā merā āārīrā, musārē āsū āārību: “Baaburi moā wajataduabino baabirikōāburo”, āārību. ¹¹Gajerā musā iriri kerere guare āsū āārī werema: “Surāyeri ĩgūsā merā moāmerā āārīma. Moābirikererā, wārī irimoāmarī merā gajerārē garibogorenarā yāma”, āārīma. ¹²Gua marī Opū Jesucristo wārī merā ĩgū dorero merā irasirirānorē: “Irīmoāmarīrē iropāta irika! Musā baaburire, musā gāāmerīnorē moā wajataka!” āārī werea.

¹³Guayarā, gariborero marīō ōārīrē irinikōāka! ¹⁴Gua dorerire ĩ pūgue gojarire tarinugāgūnorē ĩāmasī, ĩgūrē guyasīūrō tariburo, āārīrā, wapikūbirikōāka! ¹⁵ĩgūrē wapikūbirikererā, musārē ĩaturigure irirosū ĩābirikōāka! Musā pagumūrē wererosū ĩgūrē wereka, ōārīrē iriburo, āārīrā!

Pablo ōādoretūnudea

¹⁶Marī Opū ĩgū basi marīrē siuñajārī merā ōārō āārīrikumakū irigu musārē āsū iriburo. Musā noó waaró, musārē gajerosū waamakū, siuñajārī sīnkōāburo. Musā āārīpererā merā āārīburo.

¹⁷Yū Pablo, yū basita ĩ ōādorerire gojāa. Yū musārē gojanarōsūta gojāa. Irasirirā musā: “ĩgūta gojañumi”, āārī ĩāmasīrākoa. ¹⁸Marī Opū Jesucristo musā āārīpererārē ōārō iritamuburo. Irasūta iriburo.

Iropāta āārā.
 Pablo